

**共同經課 - 1 使徒行傳九章一節~六節, 七節~二十節**

1 掃羅猶久一味哄喝愛劊主的學生, 去見祭司頭, 2 對伊求批互大馬色諸個會堂, 若抵著趁此個路的人, 無論男女, 伊就通縛 in 帶到耶路撒冷。3 行近大馬色的時, 忽然對天有光, 圍纒照伊; 4 伊就跋倒佇地裡, 聽見聲給伊講:「掃羅! 掃羅! 啥事窘逐我?」5 伊講:「主啊! 你是是誰?」講:「我就是你所窘逐的耶穌。6 總是你著起來, 入城, 你所應該做的, 欲給你講。」7 同行的人靜靜佇啲, 聽見聲, 也無看見人。8 掃羅對地裡起來, 目睷展開, 袂看見甚麼。人牽伊的手, 導伊入大馬色; 9 歷過三日袂看見, 無食也無飲。10 佇大馬色有一個學生, 名亞拿尼亞。主佇異象中給伊講:「亞拿尼亞啊。」伊講:「主啊, 我佇遮。」11 主對伊講:「起來! 去彼條街路叫做直的, 佇猶大的家, 尋大數人, 名掃羅。因為伊抵抵啲祈禱, 12 閣有看見一人, 名亞拿尼亞, 入來給伊按手, 互伊會看見。」13 若是亞拿尼亞應講:「主啊, 我聽見多多人講, 此人佇耶路撒冷會怎樣大歹款待你諸個聖徒, 14 閣伊佇遮有諸個祭司頭的權通來縛見若求叫你的名的人。」15 獨獨主給伊講:「做你去! 伊是我揀選的器具, 欲報揚我的名, 佇外邦及國王, 以及以色列子孫的面前。16 我也欲互伊知, 伊著因為我的名受偌多的艱苦。」17 亞拿尼亞就去, 入伊的厝, 手按伊, 講:「兄弟掃羅, 主就是你來的時路中出現互你看的耶穌, 差我來, 互你會看見, 閣得著聖神充滿。」18 連鞭對伊的目睷有物磕落, 親像魚鱗, 伊就看見。起來受洗禮; 19 已經食就勇健。掃羅及大馬色的學生相及住幾若日, 20 連鞭佇諸個會堂宣傳耶穌, 講伊是上帝的子。

**共同經課 - 2 詩篇三十篇**

1 [此個詩是獻宮殿的歌, 大衛做的。] 耶和華啊, 我欲尊重你做至高, 因為你曾提拔我, 無互我的仇讎對我誇口。2 耶和華——我的上帝啊, 我曾求叫你, 你就醫好我。3 耶和華啊, 你曾救我的靈魂對陰間起來, 你互我活啲, 免致入墓。4 耶和華聖的百姓啊, 恁著唱歌嘔啵伊, 記念伊的聖名來感謝伊。5 因為, 伊的受氣不過目 久; 伊的恩典是一生的久, 歸暝雖然有啼哭, 早起時就有歡喜。6 論到我, 我佇亨通的時, 就講: 我永袂搖拙。7 耶和華啊, 你曾施恩, 互我的山豎在堅固; 你掩你的面, 我就迫腹。8 耶和華啊, 我求叫你; 我對耶和華求恩, 講: 9 我流血, 我入墓, 有啥利益? 塵埃豈會謳啵你, 豈會報揚你的真實嗎? 10 耶和華啊, 求你聽我, 憐憫我! 耶和華啊, 求你幫助我! 11 你已經將我的啼哭變做跳舞, 你將我的麻衫褪去, 用歡喜給我結, 12 通互我的心神唱歌謳啵你, 亦無靜靜。耶和華——我的上帝啊, 我欲感謝你, 到永遠!

**共同經課 - 3 啟示錄五章十一節~十四節**

11 我閣看, 就聽見座位及活物及長老的周圍多多天使的聲; in 的額數千千萬萬, 12 大聲講: 受劊的羊羔合宜得著權能、富有、智慧、氣力、尊貴、榮光、謳啵。13 閣聽見佇天、佇地、及地的下面、及海面, 一切受造的物, 及其中凡所有的, 攏講: 謳啵、尊貴、榮光、權勢、攏歸互坐佇座位者及羊羔, 到代代無盡! 14 四個活物講:「阿們!」許個長老就仆啲拜。

**共同經課 - 4 約翰福音二十一章一節~十九節**

1 諸個代誌以後, 耶穌佇提比哩亞的海邊閣顯明家已互學生看。伊的出現記佇下底: 2 有西門彼得, 多馬稱低土馬, 加利利的迦拿人拿但業, 西庇太的子, 猶有學生二個, 攏相及佇啲。3 西門彼得給 in 講:「我欲去討魚。」in 給伊講:「阮亦欲及你去。」就出去, 上船; 彼暝無掠著甚麼。4 天拂光, 耶穌倚佇海坪, 若是學生毋知伊是耶穌。5 耶穌就給 in 講:「細子啊, 恁有物配無?」in 講:「無」。6 伊就給 in 講:「拋網佇船的正旁, 就會得著。」in 拋落去, 就網拖袂起來, 是因為魚多的緣故。7 對按呢, 耶穌所疼彼個學生給彼得講:「是主啦!」西門彼得一下聽見是主, 因為褪腹裊, 就用外衫來結, 跳落海。21:8 其餘的學生, 因為離坪無遠, 約略三十丈, 用細隻船來拖彼網的魚。9 到上坪, 看見有啲 的炭, 頂面有魚, 閣有餅。10 耶穌給 in 講:「抵仔拋著的魚, 掠幾尾來。」11 西門彼得就起去, 拖網上坪。有大尾魚滿滿, 共一百五十三尾; 魚雖然許多, 網亦無裂。12 耶穌給 in 講:「來食早頓。」學生無人敢問伊:「你是是誰?」因為知伊是主。13 耶穌到, 提餅互 in, 魚亦是按呢。14 耶穌對死人中復活了後, 出現互伊的學生看見, 這是第三擺。15 已經食早頓, 耶穌給西門彼得講:「約翰的子西門, 你疼我卡贏諸個嗎, 應講:「主啊, 是, 你知我疼你。」耶穌給伊講:「飼我的羊仔子。」16 第二擺閣給伊講:「約翰的子西門, 你疼我嗎?」講:「主啊, 是, 你知我疼你。」耶穌給伊講:「照顧我的羊。」17 第三擺給伊講:「約翰的子西門, 你疼我嗎?」彼得因為伊第三擺給伊講「你疼我嗎?」就憂悶, 給伊講:「主, 你無所毋知; 你知我疼你。」耶穌給伊講:「飼我的羊仔。18 我實實給你講, 你少年的時, 用帶家已縛, 照所愛來行遊; 獨獨到老, 你欲伸手, 別人就縛你, 拖你到毋愛去的所在。」19 (耶穌講這話是指彼得欲怎樣死, 來榮光上帝。) 已經講按呢, 就給伊講:「隨我!」